

四庫全書

集部

欽定四庫全書

篁墩文集卷四十二

明 程敏政 撰

碑誌表碣

槐瀕先生程君墓碑銘

昔杞宋以王者之後孔子猶歎其文獻不足徵而況其餘乎程本周之侯國休父則始封者也其後國亡而子孫散處於晉曰嬰者死趙事號忠誠君世望河北至東晉有元譚者守新安以循吏賜居郡中由是江南始有

程姓者凡數傳至陳將軍忠壯公靈洗有禦盜全郡之功食其鄉州廟號世忠程以是益顯至唐定氏族而程遂居十大姓之一胄系之蕃幾有一郡之半又蔓衍於四方由宋至今其居歛之槐塘者曰元鳳起進士相理度兩宗號吉國文清公公六世孫曰槐瀕先生諱孟以諸程自唐以來譜牒山委莫能相通乃遠者走書近者親會盡發我宗人之藏手自披校窮二十餘年為程氏諸譜會通五十卷外譜二卷忠誠太守忠壯三祖遺蹟

及褒典經元季之亂蕩無存焉先生又搜輯而類次之
為世忠事實源流錄十卷文清公手澤及理宗御書多
淪於異姓先生不惜重購之以歸為明良慶會錄三卷
於是新安之程凡數百年文獻之傳賴以弗墜而先生
亦不可作矣嗚呼若先生豈非孔氏之所見予者哉先
生字文實槐瀕其別號也性誠樸而孝友動必以義終
其身為族黨師鄉人化之郡邑大夫歲時禮於其廬力
學好古愈老不倦其纂述別有黃山小錄諸書而新安

總志尚未脫稿所自著有槐瀕集若干卷其卒成化乙酉四月二十五日享年六十有七墓在本里荷塘山之原子三人景岑景山景微孫五人琬琰琰琮琬瑤皆能守先生之遺書而讀之敏政於先生為族子宦居北方不及敬拜牀下而數辱手教惠顧諄復蓋寤寐之不忘也謹撰銘文一通寄其諸孫俾刻諸墓上之石以昭先生於無窮銘曰

猗乎先生其弗死兮維古程國之肖子兮篤我宗誼而

弗之圯兮聞我先猷而實是紀兮相爾公孫之復其始
兮胡寧在彼而不在此兮爰卜斯藏於槐之里兮羌山
之崔而水之瀾兮猗先生之名兮曷其已兮

歙處士汪君墓碣銘

士之居斯世者不越乎出處兩途然各有道焉非苟焉
耳矣出而忠處而孝斯道之極致而生死無愧乎士之
名不然則苟焉者也歙處士汪秉祥父之卒翰林侍讀
尹先生為壙銘稱其孝無愧古先民而處士之子尚恕

復請予銘其墓上之石子生不及識處士將何恃而銘
既謝不敏而尚恕請之不置又遣其子曦託其友黃進
士宗器胥促其成予終不敢辱命則以處士之大凡扣
宗器宗器之言如壙銘予不覺慨然太息為序而銘之
以詔其後人序曰秉祥父其先居績溪唐越國公華之
後族鉅而胤蕃累遷歙之潛川故今為歙人處士之曾
大考仲堅大考用彰不樂仕號秋江漁隱考士元生處
士六閱歲而卒母胡氏守節長育之時漁隱尚無恙特

鍾愛處士曰是幼而孤者不可使羣于自棄而使人弗友口授之詩書處士亦知自奮以繼述先德不為嬰孺態既長痛父早世每歔歔不自勝而幸祖若母俱逮養之惟恐弗及所居之堂榜曰奉思鄉人及四方士聞之咸嘖嘖歎曰孝哉汪氏子多詠歌之歲丙寅家弗戒於火處士倉卒入先祠奉神主宗譜及秋江漁隱詩卷以出家皆不一顧處士襟度灑然不喜齷齪士見者知為美君子閱書史遇古之孝友者反復不釋手思與之

齊故卒以孝稱家居待宗姻里族無矯情出遊江海上
友其賢豪不樂為婣姻至賑窮周乏則腆不恤屢不厭
老而重聽謝家事付諸子別號止軒日杖屨山水間以
娛老神氣清明迨易簀不亂治命諸子曰若能敦孝友
葬祭不伍流俗吾死不憾不然非汪氏良子孫言既而
逝正統戊辰十月二十有八日也壽六十以其歲葬歙
嘉充山之原配里人吳氏女有懿行以己不育子禮聘
側室胡氏而友愛之卒以有後卒永樂壬辰三月二十

有四日壽若干葬里之胡村繼朱氏女尤孝敬嘗割股
和藥愈處士危疾卒景泰甲戌正月二十有四日壽六
十有四葬祔處士塋子男四長即尚恕次宗敬從政尚
茂女二婿許仁善吳紫垣孫男七長曦即連銘者次昶
昇暹景昭暉女四皆未行嗚呼處士雖不出為世用而
羣行皆不苟孝尤卓然其可謂有道之士已夫銘曰

豫章無根枝葉其瘁乎渤澥無源支流其匱乎人而無
孝子孫其墜乎嗟嗟君子猗無愧乎好是懿德而不倍

乎蒼蒼者天羌錫類乎我銘其阡百世其無廢乎

處士黃君景高墓誌銘

君徽之休寧人諱維天字景高其先自霍山徙潯陽有諱堅者唐乾祐中自潯陽徙休寧之古林十四世孫允清為宋咸淳庚午貢士始業儒君五世祖也高祖方號秀嵩故右春坊司直郎汪蓉峯先生為之記曾祖嘉祐不樂仕與鄉先正翰林待制鄭師山待講學士朱風林徵君趙東山三先生友善祖樞世其學元泚東道元帥

李克魯嘗聘為孰賓國朝屢徵不起學者稱後圃先生
父民娶程氏生君君長於儒家務以繩武為事而明敏
過人凡六經諸子口誦手錄不研精不已下至古今名
物制度沿革世代廢興與夫百家衆技之書悉淹貫有
槪疑事就問者應口即畲首尾不遺詩與文不苟作書
法喜黃庭率更籀文隸古咸極精妙居簡重不妄出入
竟日危坐無惰容至與人之際則內外一致無機巖之
設慎許可題其燕居之所曰嚮明以寓崇善抑惡之意

鄉先生程公若虛叙而銘之君家誨尤嚴以故長子莆克自奮以明經教授為古文詩章不愧君而與人辨論道理長書累牘必求其是識者韙之君生於洪武甲戌五月二十六日卒於天順癸未七月十九日享年七十配金氏繼俞氏子男二人長即莆次曰冀女二人長曰蒞適吳藩次曰蒞適金寧孫男二人曰光岳曰燿政莆既以成化乙酉正月一日奉君柩窆鄉之大園以俞附而致刑部員外郎汪君進之狀來乞銘將追納諸壙中

予觀世之號世家者其子孫不一再傳多放浪不檢以至於敗求其謹守以不墜田廬者鮮矣矧嗣其詩書之業至於七世之久如君之家者哉予與君生同鄉辭其銘不可銘曰

繫先世之烈兮羌舌之代耕也既後昆之埒兮亦學之嗣興也眷美人之修潔兮古林之士英也胡挺挺以自揭兮不矯矯以為名也竟塵網之不屑兮捐松喬之永齡也播清風於巖嶠兮尚考於此銘也

孺人呂氏墓誌銘

予初識泌陽焦孟陽於婦翁太師李文達公家時孟陽已職太史挹之淳然有古儒者風度因納交焉其後得聯官每止其寓舍中閒然無譁也頃之輒出酒食以飲食我孟陽若不與知然孟陽性落落每退朝騎馬過友人家觴咏終日家事一不自撓予竊意其得內助不然何逸豫乃爾歸嘗以語室人室人曰然且為予道其故曰焦孺人呂家女初以鄉人子來吾家將其三子以見

先太師其服純然無綺容又拜起不失矩度應對甚閒
先太師喜甚顧先夫人曰焦氏有婦矣出文幣與之先
夫人素莊嚴女賓之進謁者有少違禮多不得辭色去
獨愛賢孺人嘗自解其簪珥以畀予時侍側切健羨之
每佳辰令節則遲其來來則相對語竟日皆婦道所宜
不雜世俗語予或取古今列女傳小學孝經諸書為講
解孺人即了其義蓋賢明婦人也未幾聞得孱疾百藥
弗療久之竟不起時成化戊子四月五日也孟陽哭之

甚悲將以明年春歸其喪卜葬山郭之原以狀來乞銘
曰孺人與焦皆邑人譜燬其世無所於考可知者曰孺
人曾大父諱恭當元之季常率鄉人據險以捍盜邑井
賴之大父整父德母魯氏孺人年十七歸芳奉舅姑孝
謹能得其懼處妯娌待姁戚御僕婢皆有道歲時奉祀
甚謹雖疾猶力起從事教諸子未嘗煦煦然有過即以
告故皆循循有可望以成者疾革惟引手向芳曰脩短
數也勿戚戚以吾故過傷所恨不獲終事子奉舅姑耳

春秋僅三十有四三男子曰琦瑞瑾一女子殤孺人沒後六越月乃受敕贈嗚呼悲夫是可銘已銘曰

容之娟娟行之顙顙于歸孔賢而不永厥年有赫恩封身後斯延繫彼永年越國封之駢世亦多有而獨不然抑誰之為愆也吁嗟乎天

唐處士茂本墓銘

徽之老儒君子自宣德以來無慮十數而予生晚又官走南北不及見之獨時時見其著述追古作者真一鄉

之盛也若唐邦立處士其一人焉處士諱茂本居歙之槐塘為世儒家高大父諱元勝國時徽州路學教授曾大父諱仲實紫陽書院山長大父諱子儀永樂初趙王府紀善三代俱以文鳴鄉人目為小三蘇父諱允吉生四子處士其季也處士自幼長進不凡正統中允吉為仇家逮至京處士侍行時年十三懷疏擊登聞鼓求伸其枉詞氣不屈見者壯之未幾允吉以憤鬱病死處士哀毀過當扶柩歸寔茹苦歷辛人不能堪初允吉罹患

家業蕩然處士既長竭力經理凡舊物多克復門閭締
構一新過者忘其家之中危焉奉母鮑及生母張孝敬
無貳與二兄茂支茂端弟茂美友愛甚至茂美早亡處
士在姑蘇聞之驚哭廢寢食撫其孤過於己子云處士
力學好古讀書強記歛之鮑謚齋程槐瀕兩先生稱其
詩章不愧迺祖授徒里中人服其化中年資遣其子弼
入學為諸生遂載書出遊江湖間友其賢豪以自適成
化己丑寓臨清忽得疾亟促裝歸至錢塘適子源來迺

處士迎語之曰家之成敗由於弟兄之和戾汝曹勉之
過淳安瞑目於舟中是歲六月二十日也春秋五十有
一源奉旅櫬還葬其鄉某山之陽處士配同邑潛川汪
道壽先生女有淑行處士敬之子男三長源次弼季善
女二長適汪祐次適汪惟節孫男四處士兄子兩人曰
貢士佐既助源以襄事曰進士相又致源所為狀求予
銘銘曰

繫欽唐之世兮家孔殷學優而缺膺仕兮文聲益振有

處一士兮邁前聞奄其身之朽兮名不湮琢斯志兮山
垠有道其處兮尚式乎鄉先生之墳

承德郎應天府通判林君墓表

嗚呼此予友林君孟陽之墓君諱春其先居台之寧海
曾大父洪武初以誼誤謫戍金陵大父扈晉恭王之國
遷太原父本榮再遷代州用君貴贈承德郎應天府通
判至君又遷龍門龍門宣府屬部也故定居宣府君少
有大志以家遭難思有以振之乃入萬全都司學為諸

生日夜策勵治經之暇尤肆力為古文詞及書翰學日以成景泰庚午遂領順天府鄉薦上禮部中乙榜不就入太學從游翰林學士呂文懿公文懿稱為老友然君數奇凡五舉進士不第待次吏部以天順癸未授通判應天府初考賜敕命進階承德郎再考復以最書政聲日著會應天府秋試檄君分理場屋事事勞得疾遂不起君外和內剛家食時守邊重臣若都御史羅公亨信李公秉戶部侍郎劉公璉皆雅愛君而吏部侍郎葉文

莊公為參政時尤相推重然君遊諸公間惟以禮接至
於外事一不挂口家素貧有逮繫貴重賂要其入釋者
力謝絕之雖以禮遺之金帛亦卻不受太子少保姚文
敏公暨家君皆文懿同年友每喑喑歎曰林上舍謹厚
君子也宣府窮邊中朝薦紳多謫居者若禮部侍郎倪
公謙輩皆素以文學名一見君即款洽如平生性酷好
書雖揮汗呵凍不廢如太師楊文貞公西巡扈從詩太
保王文端公碑陰記見者不知其君書也率以為黃養

正書其所得如此君在官專董馬政攻駒考牧下無敢干以私每行縣止食公廩時蔬官解隙地至則摘以自給其卒也貧無以殮時家君方守南京為哀衆賻舉其喪君生永樂辛卯七月九日卒成化辛卯九月五日春秋六十有一配朱氏封安人子男四澤潤浹泗女二淑蘭適袁寬淑蕙在室孫男四熙輝炫耀孫女一嗚呼文懿公門人最多君最長子最少其餘若太常少卿李本大理少卿田景暘國子司業耿裕禮部郎中李溫輩先

已取進士去惟君與予天順中尚執經在館下其好尤篤每有制作必相與商訂然後出以示人自官走南北未始一日不往來於懷也孰謂君遽以死乎君之喪道出北京予既哭弔之方將求君平生之文輯以傳後而澤等以倪公之誌來請表其墓故枚淚書之

陳母林孺人墓誌銘

監察御史龍溪陳宣奉詔擿奸於畿內以達山東之境事未竣聞母孺人喪即日為位於行臺以哭哭幾絕遂

解組北上以聞既得命持服乃白衣冠詣予乞銘憶當天順中大人嘗館君於家君不鄙而與予友且善銘其母之壙予何可辭按行人司正林君雍之狀孺人世家龍溪之金浦父克靜母某氏生孺人既笄歸御史之父朴菴先生先進為繼室孺人性慧而順家居時得二親懼其在陳氏不逮事舅姑恒以為恨遇歲時忌祭供祀禮如生存朴菴性質而少文凡家業之成多孺人匡輔雖饋食紡績事之勞且賤者必親之為諸婦先先配有

二子孺人教育之若己出皆底有家其教御史尤嚴以故御史宅心行己一不汙流俗孺人生洪武丙子九月十六日終成化庚寅七月七日壽七十有五子男三人長即御史也次曰輯曰侃女一人曰銓嫁士人許乾疊孫男十人長曰紹次曰琳曰貞曰仁曰元曰發曰義曰奮曰跡曰樂曾孫男一人曰朴初朴菴先生嘗預卜壽藏於南山之原卒而葬焉至是御史歸以是年某月某日奉孺人之柩祔嗚呼孺人以孝敬慈賢之德由處迨

金匱要略卷四十二
嫁積有令稱而又躋上壽享有多子孫且御史號能官
推恩榮之典計日可得則天之錫予善人不誣也哉銘
曰

有淑一人實好速兮歸此漳士厥聞流兮脣也孔蕃齡
之修兮溘然以終閔斯丘兮我銘永昭盍千秋兮

贈武畧將軍錦衣衛副千戶孫公墓誌銘

公諱忠字克誠姓孫氏上世居蘇之長洲祖曰思道元
樞密院判知大寧義州事國初戰歿松山公隨父福興

以二州內附公為錦衣衛百戶十餘年而終時成化庚寅
冬十月丙寅也享年七十有三公天性淳篤不類武人奉
母甚孝其謝病而歸也遇母夫人喪時年已七十哀毀踰
禮手植松檟數百章卒以憂瘁致疾不起友其弟斌無纖
芥反目意身使異域三十餘年每行則正使必以行營機
宜付公公亦悉心為之致力常先事而計畢中肯綮蓋庶
幾古之善使者與配王氏有賢行子男二人長即賢以功
進武畧將軍副千戶故贈公以其官次正女一人適錦衣

衛百戶何琳公之終也賢以待禁不敢東還發喪乃遣
正奉公樞北上將以成化辛卯某月某日葬公於順天
府通州鼻壕鄉之原前期以狀來乞銘走憶天順初家
君受詔視師遼東始識公於京邸握手相好成化初家
君總師討四川貴州山都掌叛夷賢隸戲下且公父之
墓石家君書之公之墓石走豈可以不書銘曰

猗嗟孫侯發軔自東有偉其器丁時奮庸爰入朝鮮名
王稽首載涉東夷招我逋寇海西兩酋罔睦其鄰公將

帝命國威以振公當北使皇狩于野遙遙屬車公為從者相昔定遠爵與功崇公獨何為一尉而終公雖云亡有子丕顯將軍之封懿此恩典渺渺靈輦瘞彼郊關我銘其中千載弗刊

一品夫人常氏壙誌銘

夫人常氏子諱善榮故家充之滋陽妻於李是為封光祿大夫柱國少保吏部尚書兼華蓋殿大學士諱昇之繼室贈特進光祿大夫左柱國太師謚文達諱賢之繼

母少保故鄧之名士其元配葉夫人生三男六女一受
封安人而卒夫人當正統丁卯既壯來歸相少保以敬
正治家儉以肅待宗姻睦而有禮撫諸哀子女如己出
壺內之德雅與葉夫人埒用是少保禮之宗姻宜之家
人嚴憚之諸哀子女孺慕之以謂葉夫人良不死太師
歷四朝累自兵部侍郎進吏部尚書自太子少保進少
保自翰林學士進華蓋殿大學士蔚然為時名臣故累
用其恩于夫人以封于葉夫人以贈皆自宜人淑人夫

人以至一品夫人之生永樂甲申五月二日歿成化壬辰六月十日壽六十有九訃聞上遣使賜祭于是三男者長太師及仲謙皆先世惟季讓為監察御史六女一未行而亡其五婿孔文韓暹丁震牛星夏英孫男六璋尚寶司丞璜玠瑄珍一殤女四婿鄧州守禦千戶黑顯翰林編修程敏政宣聖六十一代孫孔弘緒一許聘順天府經歷王公子冕諸孫子卜以是歲十二月八日奉柩祔於少保賜葬之塋葉夫人之右不鄙使敏政為之

志志已復系之銘銘曰

蚤弗偶晚于歸夫受室于奉闈嬈先嬪德之懿啓後華
福斯被誥錫封生之亨御遣奠歿之榮產於充殯於鄧
永無虞終有慶

明威將軍神策衛指揮僉事致仕黃公墓誌銘

公諱琮字進賢世居徽之休寧其先多隱德至考彥斌
甫妻徐氏女生丈夫子七人家始殷里之識者策黃氏
必大貴既而仁宗昭皇帝臨御冊公女弟為貴妃特遣

二中貴人驛召彥斌甫至京授神策衛指揮僉事賜第一區賁予恩數甚渥七人者公最長實侍北行上召見亦授錦衣衛百戶未幾彥斌甫捐館嗣為神策衛指揮僉事公雅不以貴戚自驕年六十即以官授諸孫惟日端居自適而已成化初今上皇帝復冊公長孫女為秀懷王妃公之女適王氏者有甥曰曾亦選尚嘉善長公主為駙馬都尉公夫婦尚無恙惟時以手加額曰吾家藉先世之靈迭被寵光飛香椒畹恨無德以將之聞者

嘉歎成化癸巳九月十二日忽一疾不起享壽八十距
生洪武甲申二月七日上聞訃遣使者賜祭蓋特恩云
公配桂氏南京錦衣衛百戶福之女以慈賢重戚里封
恭人子男三人長昱以親藩恩授中兵馬指揮次晟嗣
錦衣衛百戶次杲為義官女二長適錦衣衛百戶韓俊
次適錦衣衛指揮僉事王珩孫男九長欽後公數日卒
次鑑次鍾嗣神策衛指揮僉事次銘次鐸次鉞次鏞次
綱次銳女五長即秀懷王妃亦先公卒次適伏羌伯毛

銳餘未行曾孫男一曰彭年女四俱幼公平生孝友事
二親存養終慕如一日諸弟處江南歲時問遺不絕貴
妃從葬景陵每時祀北望揮涕不已與人交不蓄中對
賓客恂恂執謙如弟子雖貴富而服食儉素惟好善樂
施予不厭子孫滿前佳辰令節奉觴稱壽恒諄諄以盛
腆為戒走嘗與鄉人造公公款之竟日其貌溫醇其言
簡而不夸有類乎古之仁人長者竊意其享福有自也
是等將以是歲十一月十五日奉葬順天府懷柔縣銀

洞里賜地之原以走與公生同鄉來請銘走聞徽之鎮曰黃山山之下在唐有黃芮者嘗刳股以愈母疾又廬父之墓以致連理木芝之祥見於史而爵位不聞豈天欲錫報於數百載之後而得公乎銘曰

黃山崇崇毓彼黃氏懿其前芳有唐孝子爰錫爾類繄天孔仁不食其報以啓後人猗神策公岨然中起嬪我仁廟維公之娣豈惟皇嬪慶迭斯臻妃我懷園維公之孫亦有公甥玉立在旁帝姬娟娟釐降于堂羌孰如公

維齒祿位越顯孫子維德不匱奕奕几筵宸章奠之肅
肅冠裳賜地寔之史臣刻銘置此寔寔中有耿光百世
無斁

孝友徐君墓誌銘

孝友人道之大經自隆古以來見於孔子刪正之書以
為法者兩人在書曰君陳在詩曰張仲降及後世嗚呼
歟矣今有人焉一鄉之中稱之為孝友則固一鄉之善
士若河間徐君殆其人與君諱文字彥章先世居南昌

之新建父曰思恭永樂中以誼誤戍河間生君兄弟而卒遂逸先世名君孝友出天性痛其蚤孤奉母吳滄隨之養備至每先意承順恒懼失其懽母卒哀毀骨立治喪一用朱氏禮鄉之賻祭者千餘人與弟讓同處至髮種種未嘗疾視二女弟既相攸或不給恒周之無倦意視諸從子如己出里之號義門者必曰徐氏然君不為奇詭之行至考其家庭間肅肅雍雍務盡道理則與古人若冥契鄉先達嘗為孝友傳以贈蓋實錄云君生永

樂丁亥正月十四日卒成化辛卯七月二十日享年六十有五配余氏相君無違禮子男三長曰益次曰寧儒學生余出次曰盤側室許出女二壻賈英張拯皆儒學生孫男五曰某某君平居喜儒雅惇義行一時薦紳士夫咸樂與遊有以不平來質者多一語而解足未嘗闖公門雖武弁亦禮君不敢以尋常士睨友戚之婚喪有奩槨不具者率餽之泉布歲出息聽其償有不足者罷不與校丁歲歉朝廷募入粟補官或勸之行君謝曰布

衣分也吾寧出羨貲以濟飢不敢藉之以苟簪組雖家用饒而崇約戒奢恥徇俗子姪館甥服章縫者五人所謂一鄉之善士若君非邪君從子曰盛來就試京闈未撤棘得其弟儒學生簠所報訃既為位以哭復以誌屬予曰將歸奉窆於八里莊之原而納諸幽予生也晚計為童稚時嘗識君今官走四方十五年矣慨夫老成凋謝不可復見庸撮其行之大者題諸墓曰孝友徐君而繫之銘銘曰

有媿徐君式孝且友羌出爾真匪性之揉寄跡諸武家
誨孔文里門有燠義聞斯振楚楚南州展也無愧嫺黨
之嗟善人之瘁里莊之上窀穸隆然太史刻銘百禩之
傳

崇府審理正孫君墓誌銘

成化甲午春崇王以今天子介弟開府汝寧凡一時文
武僚吏皆從惟審理正孫君迪方以疾在告王為展行
期者月餘君使其長奏曰王事有程勿以臣故撓之臣



行且差矣王行而君卒訃聞王嗟悼以不及遣視為恨
命中使以香幣致弔賜寶鏹若干緡俾治葬君無強壯
子在側因權厝都門外僧舍中乙未秋君子珩始來自
江南將扶柩歸寔祁山之陽以金谿教諭汪恕之狀乞
予銘嗚呼悲哉君姓孫字元吉其先有諱郁者南齊初
為齊府長史逮數世至安卿為祁門令因徙家焉君生
穎敏少從鄉先生游彊記有聞迨長益肆於學景泰癸
酉領京闈鄉薦五舉進士不第成化丙戌秋今天子詔

吏部擇可傳諸王者君在選中授中書舍人侍崇王戊
子王出閣改審理正賜舍人敕命封父仕興為徵仕郎
母黃妻謝皆孺人君平居孝友初得官即分祿之半以
養親為詩文典雅應教之作有諷有規王寵賚之與人
交見底裏風度灑然無一毫塵壒氣卒於甲午二月二
十九日得年四十有七謝孺人同邑名家女自君為諸
生至應舉出仕清澹之操皆與之俱姑病目不見每旦
以水漱舌升堂餽之久而復明卒於辛卯夏五月二十

一日得年四十有二子男一即珩也女三長次皆聘士人家其幼則君繼室程所出也君之曾大父允清以積德重其鄉國初有宗人坐非罪沒家孥者允清贖其三孤女而嫁之又嘗為里胥長以身脫遭誣者八十餘家至君不食其報晚為王官未出國門而以客死然則孫氏之後固將有復興者乎銘曰

猗先積之素兮胡方行而仆兮引後食之祚兮亦永安其厝兮

榮祿大夫同知中軍都督府事贈左都督張公

神道碑

國初著令武臣非歷戰功不得升中世以來乃有自別
途以進者蓋予嘗攷諸國史知之未嘗不為之慨然太
息而有取於故都督張公云公生於將家以永樂癸卯
受代為留守右衛指揮僉事時年尚少屹如老成人正
統辛酉從征麓川夷酋抵鎮康州賊黨有刀門捧刀門
顛兩酋者公連破降之進攻上江拔孟底招罕諸砦兵

部尚書王忠毅公奇其功承制進都指揮僉事時諸軍
自杉木籠山進圍麓川公率偏師潛入其中堅賊帥思
任發大威走緬餘衆悉降凱還得世襲指揮使癸亥命
出理中都留守司事戊辰詔以所部從寧陽侯陳武靖
公討閩寇鄧茂七進都指揮同知景泰庚午再從入閩
殲賊孽於延平壬申進都指揮使少保于公復言張某
功多遂署僉後軍都督府事乙亥移中軍天順改元實
授副彰武伯楊信守延綏慶陽諸路抵鎮之明年敵帥

博羅入寇神木縣公出兵禦之于柴溝斬獲甚衆捷聞
賜白金綵幣進都督同知左參將專守延綏西路敵以
前不得志復入安邊營公分道拒之連戰于野馬澗諸
處俘其將鬼里赤獲馳馬兵仗及還所掠子女生畜視
柴溝倍之特受賜敕褒諭命佩靖敵副將軍印總延綏
慶陽諸路兵成化乙酉朝廷念公久於邊召還復理中
軍時方大閱得精兵十二萬命公分統揚威營迄至不
起蓋公出入兵間首尾三十五年自諸衛歷兩府論功

與能其可謂無媿矣公家都城下馬社諱欽字克敬曾祖也公祖潑廬及所後父良皆贈榮祿大夫同知後軍都督府事所生父景山曾祖母王氏祖母馬氏所後母蘇氏皆贈夫人所生母馬氏公年七十有一卒於成化乙未夏五月二十有二日上聞訃輟朝一日凡五遣禮部諭祭特贈左都督命工部給喪葬費以某年秋七月九日窆都城西山之原配郭氏封夫人子男五長振先卒次標次極次授一未名女一適金吾左衛指揮使楊

勝孫男三人長恂嗣為指揮使餘尚幼初公之捐館也
楊金吾以狀來乞予銘其墓與神道之石予固辭不獲
則為之次第如右而法多互見者不能盡書也銘曰

五軍洸洸督中外兵在帝之右開府于京孰克當之維
方與虎匪勲之多孰與為武矍鑠張公環衛之英躬屬
橐鞬自其妙齡既下滇川兩入閩粵肅我貔貅殪彼兇
猖延銀逶迤北控大河再卻敵騎屢奏饒歌捷書紛傳
官賞是懋都司留司或正或副高牙大印玉帶朱衣分

典六師亦遙公歸出入卅年有勞在國命典輝煌庶無愧色西山之麓松柏丸丸中有賜瑩惟公所安螭首龜趺豐碑載道詞臣勒文千載是考

文思院副使金君墓誌銘

惟周盛時百司庶府以暨表臣必皆常德吉士以勸相國家其見於立政之書者可攷也我朝執藝之臣外隸工部內供事於監局蓋倣周之遺制然官屬叙進多出特恩若金君廷璽則亦一人焉君諱璧世居蘇之長洲

永樂初附籍京邑祖仲名父英皆鄉之善人母沈氏既
妊君而父卒卒三月始生母訓育備至至八歲遣從社
學師自力女紅以資給之君性聰慧思用文學自奮年
十六迺以材藝召至京日事內府恭厯精鍊同事者雅
推遜之中貴人悉君之能凡乘輿服御多以屬君君所
供奉輒稱旨上識其名成化丙戌內降與文思院副使
歲時賜答優等君持之必愿無毫髮矜侈之容恒以弗
克報稱為懼丁酉春閏二月二十一日以疾卒得年四

十有六配周氏治家有方子男三曰瑩曰鑒曰鑒女二
一嫁錢銘一許歸趙靖諸子以卒之歲三月十八日扶
柩葬魏村社先塋君性孝念母蚤廢而養不逮父言及
輒泣下泫泫母生事死葬極其力之所至交人無機械
人亦樂與之游中年致身貴富克己行義振饑恤難之
心惓惓焉教諸子謹厚世其業烏乎世降俗漓求夫常
德吉士盖有王公大人之所不易者已君平素語人率
以古賢詰自厲人亦以為名壽當未止此遽爾捐館豈

非命與然身奉一職十有餘年不負上之任使其自以
為無憾矣君僚友凌君安與瑩等奉通政參議趙昂先
生之狀屬予銘鑒之妻安之女而靖則參議公子也參
議公於予有婣好故不辭銘銘曰

肅肅禁蘊皇德攸闕秩無崇卑克舉為難猗乎文思晉
以才藝溯其善源式孝與義希世之逢聖澤霑施相古
先民孰或起之魏村先瑩全歸以祔銘闡其幽百世無
斁

昭勇將軍錦衣衛指揮使孫公墓誌銘

公諱璉字國用姓孫氏濟南鄒平人孫氏自故安國恭
憲公以宣宗章皇后之父顯其子今太傅會昌侯繼之
歸然國之元舅胄系日蕃家法滋備若公亦可謂稱其
家兒者矣然壽不逮其爵君子惜之公生而淳謹不與
諸貴游相埒恭憲公鍾愛之諭今太傅曰此子必克荷
吾門宜善視之稍長出就外傳通經史大義學詞翰皆
有可觀雅嗜古名賢書畫及山石花竹之勝以自適凡

聲色寶翫若不介意今太傅既嗣伯爵天順初以翼戴
功進封侯公遂以世嫡嗣太傅之舊官為錦衣衛指揮
使雖貴富而所處益謙無一毫侈倨之態今太傅總五
軍幾二十年公長贊畫其間戲下之人多賴以濟而綜
理家政尤克當太傅之心內外僮僕咸職其職而不敢
肆與二兄瓚珍及羣從極親友歲時設燕奉諸父於堂
以次稱壽驩如也諸勲戚家以為美談一或有不睦者
即相率以孫氏諭之公居母夫人丁氏喪哀毀甚或勸

止之曰太傅春秋高二兄方有事西南夷宜自愛公泣
謝曰惟送死可以當大事執禮彌篤卒襄事得孱疾幾
數載弗愈恐貽父兄憂恒勉強若無疾革惟對人垂涕
以弗獲終養為恨又諭其子曰孝事吾親勤學以無隳
先範吾目瞑矣成化丁酉三月二十二日竟不起得年
三十有六配蔣氏定西侯貴之孫先公沒繼湯氏參將
膚勸之女俱封淑人子一人曰鎮異日當嗣侯者張氏
其生母也女二人長許配武靖侯之孫趙宏澤幼在室

鎮將以五月六日奉公葬香山祖塋之西惟今太傅成
化初總史局知經筵予皆從其後而家君尚書奉命南
伐公二兄實在行故公之捐館也太傅以狀來屬銘且
予與公外舅湯公尤善湯公素名能詩既歿於王事無
子公哀其遺稿付予予為詮次而歸之公及一見而歿
悲夫其言猶在耳也忍可以不銘銘曰

良驥翩翩而蹶於行榮木欣弗究其成有淑一人方
進忽止上公之孫徹侯之子雖孝與睦戚畹之輝胡不

永年式全其歸香山之原賜塋之次尚餘慶兮在爾後
嗣

奉議大夫同知汀州府事程君墓表

君諱熙字克和姓程氏世為徽歙人其先德具予所為
君父義士傳君高祖大年元紫陽書院山長曾祖完都
祖回善出繼從父昇父萬即所謂義士者也母項里殷
氏君生而不凡喜問學提學御史吉豐彭公一見器之
選為郡庠生君家長老固以力孱請罷不許景泰癸酉

以春秋中南京秋試時學士安成彭文憲公主考得徽之春秋生雖多而獨謂君醇樸每進與語入太學祭酒泰和蕭公雲間陳公愛君如二彭凡五舉進士不第成化丙戌竟以吏部選人出身尚書鹽山王忠肅公試君第一廷授同知汀州府事時年四十餘矣君為政一以誠而不任術前後更知府張寧輩四人獨君歸然治郡事久益精明如禱暵振饑驅虎止火諸異政郡人往往播之詠歌而招安一事尤人所難者初己丑歲閩大侵

有盜千餘人自將樂尤縣四出放劫而紫雲臺者介汀之清流寧化境上號最險盜入據之鎮守中貴人及三司聞警大懼發近兵駐汀君曰是歲荒而迫為盜者亟招徠之當不煩一矢而下上官輒以坐君君單車抵臺下盜遙望見識君擁拜感泣曰某等實不獲已君一一慰撫之立散其衆燔其寨發府庫分賑之蓋不旬日而事定君復言於上官曰往歲鄧寇之起亦據是山蓋其地去官府險遠故易以變請析將尤清寧四縣之地別

置一縣於明溪鎮移巡檢司於夏陽則可保無事矣上官為言於朝賜縣名曰歸化除吏降印仍委君相其要害而城之都御史汝陽滕公巡視民瘼請旌異君以勸諸郡江浦張公繼撫八閩請以君知漳州府吏部皆以君未考績不報成化丁酉滿九載將考績矣而閩盜起於上杭巡按御史復留君治事而君以憂瘁得疾不可為矣九月二十七日竟卒於汀得年五十有四自御史以下皆弔賻汀民日走哭門下者數百人終其喪去不


絕君居家孝友既授官即請分祿於故鄉以養親而自奉泊如也每出行縣與隸卒同起居飲食遇事敢為不避難受布按兩司檄理錢穀治刑獄於旁郡旁郡之人亦德之無間言家君尚書先生於君為世父恒語人曰亢吾宗者必是子也故予得與君游最久同上禮部者再受君之益最多君元配富塢汪氏側室陳氏子男一人曰文慶女三人長適潭渡黃資智次適靈山方佐早世次適洪鄭州之子通君父義士以成化戊戌某月某

日葬君於歙西古城關祖塋之右嗚呼中世以來吏知
任法而已蓋雖有絕類之才希古之政而拘於令則亦
莫之可伸也君為郡十年蓋幾於所謂循吏者矣人孰
不意其遠且大而獨以未上其三考之績為辭又不盡
觀風者之言以少遂其貤封之孝是固命之不淑而亦
有司任法之過也此予表君之墓不能不為世道惜而
豈特兄弟之私情也哉

亡弟克寬壙誌銘

嗚呼是為吾弟克寬之墓生二十有七年矣克寬名敏
行其第二十二美姿容性警敏凡事弗為即已為之必
精其心孝友直欲上從古人不為兒女子態說理論事
必中肯綮聽者畏之其詞翰絕類予時出以示人人弗
能辨以尚書試京闈者三率以魁選望之而卒躋於命
悲夫程世家江南至家君尚書公母夫人林氏起河間
官處南北吾弟實生山東稍長從入蜀其往返兩京最
多而終于休寧故鄉其生景泰壬申閏九月九日其歿

成化戊戌七月六日其疾瘍也其妻趙氏通政叅議昂之
女生男一人舉兒五歲而殤女二人月香才三歲其一
則遺腹子也噫賤兄弟三人吾既宦學遠外不克奉親
以居所恃者兩弟而今亡其一矣聞訃之三日上書請
慰親江南天子惻然許之蓋抵家踰月始克杖淚為之
誌付仲弟敏德俾卜日葬南山塘之原置諸壙中銘曰
親不得慈其子兄不得友其弟悠悠蒼天此恨何已



篁墩文集卷四十二

欽定四庫全書

集部

篋墩文集卷四十三

詳校官編修_臣李堯棟

中書_臣劉源溥覆勘

總校官進士_臣朱 鈐

校對官監丞_臣張曾炳

謄錄監生_臣史殿榮

欽定四庫全書

篁墩文集卷四十三

明程敏政撰

碑誌表

正議大夫資治尹兵部左侍郎滕公墓誌銘

公諱昭字自明姓滕氏南陽汝州人曾祖而上俱隱不仕具太師李文達公所為先墓表公祖興贈通議大夫都察院右副都御史祖母陳氏贈淑人父霄永樂中禮部祠祭員外郎黃州知府贈中議大夫贊治尹加贈如

祖母李氏贈恭人生母程氏封太恭人俱加贈如祖母
公生宦家而淳篤不事紆綺黃州君鍾愛之長為州學
生力學不懈年十九舉河南鄉試上禮部弗利久之卒
業太學景泰癸酉用吏部選授陝西道監察御史丙子
監順天府鄉試時劉文介公主考於內公等協心於外
故宿弊盡祛而權貴人子多不在選英廟之復位也注
意臺察貶斥相望公當是時獨謹禮守法為士論所予
天順戊寅巡按京畿有聲四川都司有謀殺人獄累歲

不決已卯命公往讞之遂服辜辛巳巡按福建有聲籍
甚既還適都察院闕佐貳英廟察御史中老成無如公
者即陞左僉都御史未踰年以母喪去今上嗣位詔起
復公巡撫遼東公治邊惟謹斥堠嚴訓練備藹粟凡數
年敵不敢近塞嘗上疏言大明律乃一代定法而決斷
武臣獨舍律用例以是武臣益貪縱不檢請一切以律
從事詔從之而武臣因習久一旦有罪被黜降多騰謗
言憚事者奏格其令公議至今惜之丙戌上念公久於

邊召還進右副都御史總督漕運兼巡撫淮揚諸處兩淮歲歉民多流亡而漕卒又為大將所虐公撫摩訓飭不遺餘力由是兵民皆得蘇息己丑再召還理院事踰年廷議弭災分遣大臣巡視民瘼以公嘗治閩特命公往閩人聞公來如獲父母公為發官廩賑恤之罷行其事而利害甚衆上杭清流之境有地曰紫雲臺鄧茂七之黨嘗據險為亂自後往往有事輒發兵撫捕而是歲飢甚公曰此不可不為之慮也乃相其要害立歸化一

縣以莅之未還有詔易公巡撫蘇松諸處蓋蘇松自周
文襄公後鮮或繼之者獨公博采衆議次第舉行甚得
東南士民之心有馬馱沙最繁盛而寄治江陰民苦往
返公復分靖江一縣民兩便之辛卯春用廷臣薦召陞
兵部右侍郎九載考績轉左侍郎食正二品祿歷佐尚
書南宮白公嘉禾項公皆陰有所救正而不阿比人不
及知丁酉秋項公免公實當次有惡之者置其名於論
列中公不與辨遂致仕家居垂三年日引鄉之遺老登

眺林壑飲燕為娛世事一不挂口庚子夏四月十一日
以疾卒享年五十有九訃聞上悼惜遣使諭祭其家命
有司給其窆事將卜日奉葬州之杏園陂黃龍山之原
公先配任氏贈淑人繼孫氏封淑人俱先卒與公並兆
子男二人長暹太學生次起州學生女一人適尚寶司
少卿李璋文達公之子也公軀幹魁偉度量深沉望而
知為大器事親最孝奉異母兄盡禮而訓育其從子益
力有舉於鄉者遇人極謙雖鄉小吏必與為禮於矜恤

故舊尤惓惓焉兩當巡按四領巡撫悉以扶弱抑強為志故吏讐其威而民懷頌之臨大政決大獄優裕不迫而事以辦嗚呼若公可謂一時之望矣而不及大拜以佐天子澤生民與成一代之盛豈非命歟走之先少保襄毅公雅與公善晚有嫻好也故走嘗得升公之堂聽公之論而今已矣義不可以不銘銘曰

於皇英宗擢任臣工一出淵衷而不尚同有臣滕公發身經術自其受知終罔或失撫戎東郊靡恤飭於淮

於閩吳越之交悉有勲猷著於朝野今皇求舊莫踰公
者遂總憲程載詰戎兵匪公之來孰贊其成幡然歸休
汝水之上方遲其來孰意其喪惟皇念之諭奠有詞作
窆有儀終始之思杏園脩脩龍山奕奕中有玄宮百世
無斁

湖廣宜章知縣贈文林郎馬君封太孺人徐氏
合墓墓銘

湖廣宜章知縣馬君卒之二十八年其子孔惠以兵科

給事中考最得賜敕贈君文林郎封君之配太孺人未
幾而太孺人卒孔惠將以成化丁酉冬十月二十六日
合葬先塋前期以狀請銘而宜章之仕於朝者行人鄧
庠輩多述君政績以來走受而次之曰君諱經字用常
世居河間東光元進士國朝兵部主事視遠之孫處士
閻如之子處士初娶於李再婚於鮑而得子四人長君
次綸次綱次紀陝西盤屋知縣處士嘗被誣謫雲南
六涼君侍行遂入曲靖學為諸生不三年領宣德壬子

雲南鄉薦正統己未舉進士辛酉得宜章之命時宜章方苦於旱君至禱諸神祠而雨歲大熟君計縣素貧一歉即民無所措手創預備倉募粟常萬餘石流民聞風復業者萬計縣兵民雜處而兵常豪奪民田君下令責還之無敢譁者舊役水夫以濟江上官舟夫多散亡民病鈎考君請於朝罷其役久之政成乃以餘力新其境內諸壇廟公宇及學宮立社學公暇進其生徒親教之科貢號稱得人歲時勸農循行田野民至與其令相忘

有居不能昏葬者行病涉者率官為舉之豪猾干政者
廉捕之寘於法鄰邑民訟多相率就君請平吏民敬服
若神明然令最為湖南第一景泰庚午夏五月二十五
日終於官得年三十有九鄉民老稚走哭縣門下者日
數百人君性不苟取卒之日家無一緡之畜寮窠為之
合泉布治棺殮之太孺人姓徐氏上元人父仲華亦以
事謫雲南與處士同患難而相得知君必亢宗故以太
孺人歸焉太孺人事舅姑孝治僮僕處嫻黨咸適其宜

蓋凡君畢心於功名不以家為累者率藉內助之力君之捐館太孺人扶櫬北歸營葬如禮孤子年十有三遣就學親女紅以給其費卒底於成孀居殆三十年節益厲家業中興鄉里嘉歎晚就養京師尤諄諄以清白戒子婦卒於成化丁酉秋八月二十一日享年六十有七子男一即給事君孔惠也成化壬辰進士出身女一適東光儒學生李達孫男二長价次侗孫女三長聘南皮儒學生薛鎰次聘李東霽次尚幼走之先自江南謫河

間蓋童子時聞河間人道馬令君之名矣既長獲與君
之從弟震及孔惠同領天順壬午京闈鄉薦又獲同朝
而不佞幸從史官後則銘君夫婦之墓詎不可辭銘曰
馬氏系出扶風王儒業相承望東光一時循吏首宜章
平生婉德稱徐孀有偉一孤流其芳恩綸下及名斯揚
桓桓宰木城震方高丘奕奕二美藏後千百年殊未央

醫顧翁墓表

成化己亥秋走奔先少保襄毅公之訃也室人病不能

俱明年以賜葬成入謝於朝時病少間乃挈家而南既渡江又與其幼子皆病聞吳故多醫日夜趨吳蓋至之日而幼子死室人病危進諸吳醫弗效大以為憂郡守劉侯汝器亟稱顧珍氏之良致之而效既月病愈乃去吳珍泣拜以請曰先翁亦終於己亥之秋葬而無表惟執事者矜畀之走亦為之泣曰嗚呼悲夫子之用情猶我也忍不有以副子之志哉按狀顧之先世居汴高祖榮以醫鳴於元仕為江浙醫學提舉曾祖銘始徙吳郡

占籍長洲祖天祥父勝宗咸世其業母劉氏以永樂壬午四月六日生翁諱俊字時雍早以孝友聞其為醫不專祖上世一以丹溪為主凡丹溪書悉購之口誦心維務得其旨要出而應人之求效嘗什九吳人喜用溫補法羣起非之翁弗少徇或有疾召翁并召諸醫翁曰法後當如何諸醫曰否已悉如翁言由是翁之名益興妬者益甚翁又以其餘力讀儒書及星數堪輿長生久視之說亦皆窺其肯綮人不及知有知之者過從即款語

竟日晚營別墅於葑溪之北自號泰然有司鄉飲輒禮
之為賓蓋翁之大可書者如此至其愈人之疾而不以
射利則夫人能之不足以重翁也翁享年七十有八卒
於己亥八月十九日配李氏子男一即珍盡得翁之學
女二長適沈御醫從子壽次適都憲陳僖敏公從子鼎
孫男二長春次易女一以卒之年十二月庚申葬吳邑
太平鄉薦福山之原從先兆云走聞醫自素難以來名
家數十至於集大成者必推之丹溪其所著濕熱相火

諸論雖聖醫復起亦當不易其言而世之學醫者往往忽之不惟忽之而又非之可慨也已初先公得末疾上遣御醫來視率以為寒濕弗效最後得四明祝翁以為痿也藥之效乃今復得顧翁焉則何學丹溪者之寥寥若此乎先公捐館以嘔吐本胃熱所致醫誤進補藥疾遂以革時走方遠仕京師不及侍此終天之恨也噫走不及識顧翁而識翁之子翁之子能起走之家人而不及見先公則表翁之墓非獨以著走之不幸也將以告

夫世之為孝子慈孫者焉

圻子壙誌

太子左諭德新安程敏政之次子曰圻以成化丁酉十二月十七日生京師其祖父襄毅公在故鄉聞之喜甚為告於遠祖忠壯公之廟小字之曰祖保稍長以兄弟宜聯行定名圻庚子春其父奔襄毅公之喪其母李病不能俱因寄於其外舅祖李文達公家圻以母病故失節生瘍繼而泄痢已復病疹疹後嗽不止漸以成瘡辛

丑春其父以賜葬恩入謝於朝見圻瘠甚大駭急召醫
謀之疾少間乃挈其母子而南既道山東秋濤暑舟人
弗堪圻疾遂大作山東人藥之弗愈急渡淮淮人藥之
弗愈聞姑蘇多醫乘大風渡江幾殆而圻母疾又作一
舟遑遑以八月二十五日至姑蘇圻竟以是夜死逆旅
圻死惟呼其母意欲掇之者其母方疾革弗能應悲夫
天胡使人至此極耶圻生最聰俊凡解事皆先其兄教
之詩即成誦見書畫率諦視不苟至捉筆為摹寫狀亦

可觀不若羣兒之塗抹太甚也初其季叔敏行死無子將俟服闋告廟以圻後之不幸至是乃載櫬以歸以歲之十月二十七日祔葬其季叔墓側嗚呼使死者而有知其必曰此吾猶子也將善視之瀕葬其父忍慟為之銘銘曰

汝父汝違汝叔汝依孰使之來而適其歸也噫

通奉大夫河南左布政使程公墓碑銘

成化庚子秋予居先少保襄毅公之喪聞人傳吾河南

左布政使用元以七月一日終於官為之驚怛曰噫器
宇問學行檢才識在一時負公輔之望如用元何可多
得而遽至此豈造物者之乖乎是歲冬予以賜葬恩入
謝遇其櫬邵伯河下旅次不能為禮唁其孤而別暨予
南還則用元葬矣孤旦奉邑人前監察御史康君永韶
狀請銘其墓上之石嗚呼其尚忍銘吾用元也哉惟程
氏自東晉新安太守元譚以善政為民請留始家歙篁
墩至梁將軍忠壯公靈洗起兵拒侯景廟食於郡忠壯

十三世生唐檢校御史中丞澧又起兵拒黃巢凡再世
有全郡之功其居祁門善和里者祖中丞長子檢校戶
部尚書仲繁用元所自出也居休寧陪郭者祖中丞季
子歙州兵馬先鋒使南節予所自出也故予之族於用
元為近尚書十八世孫德堅國初以行樞密院都事守
景德鎮是為用元高祖曾祖汝楫祖景華俱不仕父顯
起鄉貢進士官至韓府左長史進朝列大夫母齊氏封
宜人用元天分最高喜問學初長史公以春秋名祁門

用元受經所得最深又旁通諸經史正統中長史公教諭河間任邱而予家先以尺籍隸河間襄毅公每往來叙宗好雅愛用元以為是必亢其宗者歲丁卯領南畿鄉薦登景泰甲戌進士第觀政戶部乙亥奉命犒師宣府總帥厚餽悉卻之都憲葉文莊公方督邊餉與語大悅天順改元授戶部江西司主事己卯犒師陝西時尚書年恭定公待部屬嚴甚獨禮用元三載以績最聞賜敕命督餉淮安一年代還上書乞歸省分祿養親從之

癸未會試用薦充同考試官儀曹奉內幣踵門用元力
辭免禮部尚書姚文敏公歎曰超出流輩遠矣未幾進
福建司員外郎督負徵於天津諸處成化改元進郎中
三載復以績最聞賜誥命是歲用兵遼東遣用元給軍
實師賴以濟庚寅遣視山東災上書言四事曰存漕運
以防民飢整兵備以衛民生減養馬以安民心增接遞
以紓民力事多舉行比還擢廣西右參政安南以地界
不定數近邊用元冒險往定之乃已理禁修墜政漸以

成壬辰以齊宜人憂歸而長史公繼卒喪葬一以禮拓
先祠以謹時祀輯先德為世芳集以傳服闋改河南右
參政奉璽書專理國儲定轉輸遠近適均法以便民又
以其暇時葺二程夫子闕里祠宇以風其士人戊戌進
右布政使明年進左布政使律已守法以倡僚屬一方
晏然欲自引章具未上而疾作矣所部黯然聞者愕眙
以為善人之不幸距生永樂辛丑正月一日享年六十
以壬寅春二月二十日葬里之宅裏塢用元為人恂恂

謹恪口未嘗及人之過巧佞者或竊笑之然其中涇渭極明有確然不可易者平居恬澹寡嗜好疑若不奈繁劇而所居官理不亟不徐喜功邀譽者反出其下蓋人陰被其惠澤甚多而世亦未盡知之為學不事詞藻雖時賦詩寫竹以適其適而緘其稿諱其名終不以自見也用元初娶祁西汪處士景淳女贈宜人再娶趙府長史同邑胡公永興女封宜人三娶胡吏部侍郎淳安項公文曜女俱善持家以佐夫子子男四人長昂醫學訓

科汪出次旦攻舉子業次杲儒學生皆胡出次昌項出
孫男三人長錡次銓次鯉女四人俱幼銘曰

惟我程氏世顯新安有譜振振有廟桓桓自歛之祁垂
休委祉大集於公策名進士筵屬司徒幾二十年巡撫
四方犒師三邊擢領藩宣或副或正桂管遺思洛省脊
慶祖我循吏以惠其民宗我師儒以迪其人名與業崇
宜位公輔庶需厥施以澤下土堪乘而蹈中棟而戕士
類孔傷予懷曷望宅塢之原山水明秀野有遺芳式在

其後

方孺人墓誌銘

孺人姓方氏諱錦僊徽之祁門人其族本宋吏部秋厓先生之後孺人生有至性在家勤女事事其父處士天生暨母馬氏甚孝與其弟昆鄉進士訓導秉琦輩甚肅年十七歸同邑善和程君恕又勤婦事善事其舅姑服其喪異居次曰禮也謹之蓋祥而後復相其夫優學以仕及累試弗薦曰命也謝之請以子啓為儒學生嗣其

業善和程氏望於其鄉恕之族父憲副宏族兄布政泰
皆近起經術進用於國退施於家亟才恕而亦賢其有
內助焉孺人年五十七以成化辛丑三月二十八日卒
於是三男曰激啓攷者兩有娶一有聘一女已適同邑
城西王氏二孫曰許詠者舉解事矣恕將葬孺人於里
之桂家塢前期使啓來乞銘予於善和程氏為同宗辭
之不獲銘曰

學勵其夫宜貴而否德勤其身宜壽而疚天嗇其前必

振其後銘以貞之庶幾弗朽

黃巖陳處士墓誌銘

婺源儒學教諭陳君簡手其先處士事狀一通過休寧
乞予銘於是處士葬十年矣處士諱顓字允甫其先汴
人遠祖公溥宋紹興進士知台之黃巖終於官因家焉
傳四世生繼發咸淳進士通判沅州又定居黃巖東門
繼發生元松門務副使儔夫處士五世祖也曾祖子安
延祐初餘姚州學正祖立善至正中慶元路照磨父處

亨號方山有司累以遺逸薦不就處士天性純至喜問學事二親極孝有人所難者哭父幾喪明竟不良於視年七十奉母馮猶定省不倦馮安其養至九十乃終初慶元君工墨梅與會稽王冕齊名方山君妙得其傳處士每時祀見手澤即悲哽不已因自號慨梅一時名流聞其事多詠歌之處士嘗以親疾歷名醫與論藥遂以醫鳴淞東友其弟顥共爨至老不變鄉先生學諭陳廷省學錄張粹皆慎交與處士師而友之於文事雖博洽

尤喜騷選二君子每曰陳君行端篤孝人也鄉評以為公處士年七十有五以成化辛卯某月某日卒於正寢明年冬葬邑南五里委羽山之原慶元公墓側配鮑氏有賢行子三人長懷待選於吏部次簡丁酉鄉貢進士教諭君也次愜亦善醫工墨梅先處士一年卒予以外艱家居辱教諭君數往來愛其人又嘗獲觀其族譜及處士所遺篆隸諸帖知陳氏世儒家而益歎老成之不可復作也然教諭君顯揚之業在異時者盖有大焉則處

士亦將以無憾矣銘曰

業之先兮有克傳兮學之後兮有克守兮嗟幽貞兮不復生兮尚有寵兮賁斯壠兮

中順大夫淞江按察司副使張公墓誌銘

成化辛丑春三月淞江按察副使張公存簡以母喪還秦州既葬未幾而病疽門人朋友親戚宗族日問病者幾百人公知不可起悉召與訣別如平時又顧其門人前進士張璵曰吾友程太史克勤最號知我其往乞銘語

既卒時壬寅春正月五日也公從子需奉獄狀走數千里來新安山中以請予聞之驚怛流涕曰孰意吾友遽至此乎噫屬纊之託不可孤也則序而銘之序曰公諱文其字存簡張氏世為泰州巨家然未有顯者至公曾祖德林祖仲信益以善聞父頎始舉於鄉終國子助教用公貴贈奉直大夫刑部員外郎母成氏贈宜人繼許氏封太宜人公生有至性在童丱如老成初助教公典教山陰公侍行適遭成宜人喪哀毀不食蓋絕而復蘇

助教公難之遣從學一時名士之門公亦自奮力學久之還為州學生屢試弗第有識者曰是不當小成者天順己郊舉南畿鄉試第一人尋遭助教公喪悉用朱氏禮一鄉化之成化丙戌遂與予同登進士第泰州入國朝預甲科自公始筮仕刑部江西司主事壬辰進員外郎癸巳吏部奏擬公山西提學按察僉事甲午復擬山東皆不果是歲進郎中公在刑曹最久有所讞必本於公恕他司獄有未具者多移鞠於公既讞無後言丙申

以日食星變詔選使十三人錄繫囚於天下公分地畿
內平反誅死者百十有六人雪徒流以下千有四百人
其辨馬平兒事尤愜人意平兒報父仇殺人抵罪公上
言君父之仇臣子所必報反覆數百言讀者感動畿內
人有繪其像而祀之者丁酉大水歲祲復有詔選使五
人賑恤之公分地兗州規措勸分不遺餘力又上疏請
分府庫餘資以慰倒懸渴望語益痛切蓋活飢民五十
二萬人復流移一萬七千口婚嫁男女之貧者五千三

百人釋大辟囚二十餘人他如通貨財修祀典申掩骼埋胔之令皆自公發之己亥陞淞江按察司副使有醜商季成誣販鹽者為盜轉引至十九人初訊者以為實多瘦死獄中存者僅六人公覆訊疑之審詰得其情六人者幸不死一省稱快餘平反者尚多在淞踰年大率以洗冤澤物為己任盖未竟其所施而以家艱歸矣公生宣德丙午五月十五日得年五十有七配劉氏先卒繼李氏俱封宜人子男二長霽劉出次泰孫李出女五

長早世次適州學生唐相次適徐蕃餘未行霽奉治命以卒之年三月四日葬城西唐家莊之原公平生孝友恒以祿不逮親為恨事許宜人甚謹與弟孜等雖相愛而策勵之惓惓以故諸子弟入秋試者恒不脫人自奉儉約如寒士周人之急則罄所有弗恡歷官內外使四方言若不出諸口而中有定見巧佞不能奪與人交雖厚善不苟隨案牘填委日不暇給而嗜學弗倦為詩文惡浮靡率有關於世教自號遜齋有雜稿若干卷審濟

錄世訓各一卷嗚呼天之生才亦難矣富詞藻以炫然
一時辦事功以赫然一方者豈無人哉求能外達其所
學而不雜內深於所養而不渝如張公者可數也顧官
止於臺佐年歟於下壽則吾之所惜又豈獨朋友之私
而已銘曰

泰有張氏其畜甚久一顯師儒弗竟其有公也再顯自
其遺經發解於鄉擢第於廷內曹外臺屢見敷歷敬刑
恤民有言有勛所養既深所發益弘羌不可禦孰尼其

行用世以忠畢世以孝維天錫之將後有耀唐莊之原
突如其墳有永無虞太史刻文

槐塘程府君墓表

府君名萬字億孫姓程氏程世為徽歙巨家其先居河
北本趙忠臣嬰之裔在東晉有元譚者守新安始家於
歙元譚之後曰靈洗當梁時以布衣起兵禦侯景至大
將土人德其全郡之功廟祀之是為重安忠壯公靈洗
之後曰延堅唐末又定居歙之槐塘傳十世生元鳳起

進士相理度兩宗是為吉國文清公府君者文清公六世孫也曾祖大年元紫陽書院山長祖完都父回善出繼從父昇母汪氏府君生負直氣侃侃遇事當行者奮前為之每以故相家更代寢微力以亢宗起廢為志中歲出遊閩浙江湘及并冀之境家日以裕聞絳之太平有祚德廟以祀程嬰公孫杵臼走數千里拜祠下手摹其石刻以歸忠壯公廟號世忠在歙之篁墩至文清公從子宣慰君相又請立行祠於槐塘以便支下子孫展

謂歲遠而圯府君合族人重修之範鐵為供器至千斤
以上餘物稱是又為文清公專祠其北割田畝以奉祀
文清公墓在歙之古城關夫人墓在禮莊皆賜葬傍有
積慶景福二寺置田二百畝以贍墳寺既燬於兵燹田
亦為僧所盜鬻石獸之類蕩無存者府君憤然訟諸上
官悉還其田寺宇塋垣及石獸之類舉復其舊樹豐碑
二以詔後人文清公初以經授理宗至為相理宗嘗大
書清忠昭光儒碩六字以賜之其餘倡和之詩往返之

書動盈箱篋有御書樓故址在所居之左府君亦創為之弘麗甲於其鄉文清公罷政歸嘗修長慶社為里人祈報之處久不葺而人憚難無敢任者府君出已貲為之倡不日告成府君之過會稽也聞理宗殯宮在城西北自以先世被恩最厚約同行者十三人置舟徑往封羊豕具酒穀祭陵下而後返府君性孝友不事矯飾讀書強記尤篤於教子遇人有過面折之不少恕鄉人無少長咸稱之曰義士義士云府君長子熙以鄉貢進士

同知汀州府有善政上官累請旌擢之褒其親不幸即
世府君時年七十四矣上書京師遇恩例獲冠服還其
鄉以成化戊戌九月二日卒於道距生永樂乙酉七月
十一日配殷氏有淑行子男二人長即汀州也次嵩克
家不仕女三人婿汪義吳禧方浩孫男四人永延長安
長英麒麟孫女二人嵩以歲己亥十一月十六日迎府
君之櫬奉葬於冕輦橋祖塋之傍乾山巽向嗚呼封建
之法廢而天下無世家自元魏至李唐乃復以門第用

人頗有封建遺意降及五季又蕩然矣而近世以來江之南往往有巨姓歸然雖更代而存者何也以予所見每一鄉之中必有一二家其附居之他姓者供佃傭給使令若官府然豈非江以南雖亂而不懼久毒雖歟而不事他徙故得相保而不至併亡也歟若吾姓在天下固不甚著而以一郡律之則已居他姓之十七八矣然同祖而異宗則其間或中微焉或中興焉亦理勢所不能免者若府君其亦可謂中興之子也夫

義官金君墓誌銘

先尚書襄毅公以成化乙未得賜歸養疾於休寧里第
又明年疾瘳始與里人金君宗敬輩徜徉山水之間嘗
至邑東祿真山崇壽道院傾而樂之因語金君曰明將
與子輩結怡老會於此中歲己亥先公卒又明年金君
繼卒會弗克成走嘗深憾於是故君之卒亟往哭之而
君之子希傑亦以其內兄上舍汪君汝溫狀乞銘君之
丘嗚呼悲夫金君蓋先友也走豈可以辭銘君字宗敬

諱珰賜世居休寧忠孝鄉相傳為漢稅侯之裔因莽亂
避地而南者逮宋季復定居邑之南市為碩宗君曾大
考志大考仲善俱以行義聞考孟起並衍並盛為萬石
區長見故翰林侍讀學士廬陵曾公所為誌妣呂氏同
邑建昌令公大之女君生有志節不苟隨早失所怙能
自樹立事呂孺人極孝扁其堂曰草心左右奉養備至
孺人安之壽八十有六乃終奉諸兄甚謹教諸子孫有
法綜家政處世犂然愜人號讀書者有所弗逮景泰乙

亥歲侵勸分君輸粟六百石助官賑民用朝令賜冠帶
寵其身旌其門曰尚義晚年益以義自處義聲動人有
為不善者懼君聞之或遂中沮有訟者或不之官而之
君得一言即釋蓋其大節如此可銘也他若闢田廬葺
橋道濟餒暍累累之善法不能悉書君生永樂甲申正
月六日卒成化辛丑八月七日享年七十有八配汪氏
西門處士士輝之女克相夫子嫺黨稱之子男五人長
岩從即希傑也次岩相次岩英次岩秀次岩護多謹愿

世家而岩相岩護俱早世女三人長適戴驚次適汪天生次適朱儼孫男七人長雲瑄次遜次雲生次悌次楫次陳次鵠孫女八人多許適名族君墓在縣北十里查坑之原銘曰

綽楔巍巍尚義之門窀穸隆隆尚義之墳耆舊凋零社不可復慕者其悲過者其肅

洪宜人汪氏墓誌銘

鄭州太守洪君寬既歸田喪其宜人汪氏其子遠方令

莆田聞訃解官還奉襄事走休寧乞予銘予納交太守
父子甚善則受而銘之按太守所為狀幾數百言詞真
事核宜足徵而其大則宜人於所生者存盡養歿盡哀
又終事其大父母教育諸弟有成乃出嫁庶幾古之淑
女於所事者奉姑如母罄力於家食奉舅如父畢志於
祿養奉伯叔鮑張二孀母如事姑庶幾古之孝婦於所
相者勉其刻志於學佐其惠政於官同其佚老於家有
始有卒庶幾古之良配於所畜者男有娶女有歸諸男

之中或力田以拓其業或傳經以續其宦治命曰男盡忠孝女敬公姑語不及私庶幾古之賢母宜人之平生若是乃不登遠壽享重封範其家以及其鄉此嫺黨悲之無間言而予之銘之無愧詞也宜人與太守皆歆之世家汪祖宋司農少卿叔詹洪祖宋龍圖閣待制中孚具有譜牒代為婚姻宜人之父仕周太守之執友母則太守之從姑也宜人生永樂壬寅三月二十四日卒成化辛丑十月四日享年六十子男四長達次迪次遠成

化戊戌進士莆田令君也次通儒學生女一適歙大里
汪鈺孫男六長儒次偉次休次伊次俸次儉孫女二尚
幼宜人之墓在二十七都名山之原銘曰

噫為淑女為孝婦為良配為賢母此洪室汪氏之墓式
顯終古

篁墩文集卷四十三